

UPNA LEH NGEINA

Kithu pua in pumkhat suaka, Vannunna Leinunna suaksak in, Leinunna ah Vannunna hong malepsak thu in sum le paai, ngun le kham te hilo zaw in, Simlei nunna Ngeina te ah Pasian tawh kizopna ahi, Upna tawh nuntakna ahihi. Upna leh Ngeina te in akilangneih, aki keelki thu nih, lamnih, hilo in, mihing te Leitungah picingtak in nungta in, Van ah zong apicing nuntak na i neihtheih, i ngah theih nadingin THU ahihi. Lam khatpan genleng, mihingte apicing taktakmi i suah nanging lei nuntak zia leh vantung nuntakzia te khatsuaksak in, Christian nuntak na akici nuntakna khat hongsuah in, Upna le Ngeina ahihi.

Upna le Ngeina in kilangneih ngeilo in, zong kinungngat ngei lo hi. Ahizongin mihing tein Upna le Ngeina kikal ah lam khak in i dingin, Upna le Ngeina te ihkhen khia a, lampi nih i suak sakthei hi. Tua thu hangin, tu hunciangin, Upna tot ding lampi atuam i sattuum a, Ngeina pai na'ng lampi i sialsak tawm thei hi. Hithu te hangin, Upna le Ngeina atuamtuak in i koiha, atuamtuak in i ena, atuam tuak in i zepnop manin, Upna picing theilo, Ngeina man theilo in i omhi.

Upna leh Ngeina in apualam pan a ente ading in, ki thupuakna, kipumkhatna omlo bangkeek in i ngaih sunthei hi. Ahi zongin Upna le Ngeina in atawntungin asungthu ah thu ki hual in, kithu ton tawntunga, amaute in nupate mah bangin nih hilo in sikhat sakhat ahi zawhi. Ahi zongin, mihingte in Upna ahi a, Ngeina ahi zongin, i utut in zazut in, i deih mel eideih dan in i zutman in, khat veivei Upna in Upna mel pualo in, Ngeina in zong ama mel le sa puanawnlo hi. Ahoihna leh athupi'tna te mihingte in zatui tawh sel in, meltuamtuam tawh sel ahih manin, apua pan bekin, a enthei mitampi tak te in Upna' sung thu thei lo, Ngeina' sungthu theilo in, lamka lai-ah din khawl in, acim uhciangin pawikham uhhi.

Banghanghiam cih leh, huntawh kizui in upna laigil vilsiam lo in, ngeina laigil hahsiamlo i hih main, khatveivei upna in ama lim le mel sunnawnlo in, ngeina in ama pianzia

pua nawnlo hi. Thankik in ama omna mun leh khuahun tawh kizui in amel akilaih mahbang in, mihing te in zong upna le ngeina melpuak zia te laihding nasep kisémkhial thei hi. Upna in minam khat ii ngeina sungah munnuam ngahin, mihing te nuntakna taangthubu ahi ngeina sungah vaipuaknei khat in mun hongngah matengin, tua ngeina nei minam te sungah upna pici hongom dingpen haksa mahmah ding hi cih phawk huai hi. Ahi zongin khatveivei ngeina hangin upna kolkhau i bulh thei a, upna hangin zong ngeina in nenniam na leh nawl khinna, etneuna leh paampaihna thuakthei hi.

Aman thutak in, upna in ngeina sungah gamhluahza angah ding thu ahihi. Upna in ngeina sungah apicing nuntak na angahtheih na'ng munzongin, ngeina in upna hangin Pasian mai-ah hongkilamsang hi. Mihingte ngeina sungah upna in munhongla in, amau nihte in, mihingte lungtang leh nuntakna sungah nih hinawnlo in, *Khat* hongsuakta uhhi.

Upna in Pasian hoihna, avangliatna, hong itna, cihthu te sangzaw leh asiangzaw in hongtheisak tawntung a, Pasian tawh asiangtho nuntakna i neih nanging, lampi hongsuak hi. Ngeina in ahih leh, mihingte leitungah anuntakzia, mihing te hoihzia, mihing te manphatzia, mite kizopzia, kihawh kilenzia, kivak kikom ziate atawntungin nungtasak in kemcing hi. Tua ahih manin *Ngeina* i ci thei hi.

Ngeina in leitung thu leh leitungah anungta mite nuntak zia ciapteht na "Anungta Thubu" hi-in, Upna in, leitung ah anungta mihingte Pasian tawh anuntak khoptheihna 'Nuntakna Thu' ahihi. Ngeina in "Anungta Thubu" cih ciangin, ahunzui in kipuahpha in, huntawh kizui in nungta a, huntawh kizui in gamtang hi cihna hi. Upna in "Nuntakna Thu" hi i cih ciangin, Upna thu in huntawh kizui in, kikhel, ki laih, cih omlo in, atawntung in tua *Nuntak na Thu* in *Thuman* leh *Thutak* hitawntunghi cihna hi.

Ngeina pen vangil kepbangin kikemtheilo hi. Amah in ahun tawh kituak in, munzongin, hiang le teh te mengkhia tawntunghi. Tua thu hangin, Ngeina in Ngeina puan, Ngeina

laam, Ngeina van te ahuntawh kituak in, i puah a, i zem a, i lamsang tawntung hi. Ngeina in hun khempeuh ah kong aki hong tawntung minam khat ii INN PI ahihi. Ngeina pen eite utdandan in, kong i khakciangin, Ngeina kongbiangah Upna neimi tampi in puuklawh in, sihlawh hi. Tua ahih manin, Lazarus mah bang upna tawh hongzuan mi tampi te, Ngeina kong biangah Ui te liak in koihin, i sisaka, eite in ihih leh, mihau pa bangin, sabuai ah tu in, i duhduh i ne hi.

Ngeina in mihingte Taangthu sungpan hongluangkha, hong phulkha, mihingte khanpih nuntaknazia te ahihi. Upna in tua nuntakna ciktui anei Topa kiangpan hong phulkha, mihing te tawntung nuntakna dingin hongluangkha *Tui* ahihi. Ngeina in mihingte' Taangthu sungpan hongpo kha 'Nuntak zia' te hi-in, Upna in mihingte nuntakna apia "Nuntakna Thu" ahihi.

Hihthu hangin, Minam ngeina, Khuangei na, Beh le Phung ngeina te in *Nuntakna Thu* ahi upna sungah nuntakna zia azonsiam ding thupi hi. Khatveivei ciangin, upna pen ngeina sungah nuntakna zia i zongsak thei hi. Tua bangthu hangin, Pawlpi le Pasian paulap in nei in, leitungvai bek tawh hun le ni te i beisakthei kha hi. Upna in *Nuntakna Thu* hina pi in, tua *Nuntakna Thu* genin, hawmin, hilhin, i piakkhiatding sangin, ngeina kongbiangah kongcing bangkeek in dingin, Laisiangtho tawikawmin, Khua kongcing, Behkongcing, U le Nau kongcing mi tampi omthei hi. *Nuntakna Thu* ahi upna tawh nuntakzia ahi ngeina te i puahding, i hahding, i zepding hina pi-in, Ngeina zangin *Nuntakna Thu* i leh puahnop man in, Ngeina kibanglo, Beh kibanglo, Khuaki banglo thu ummi, thuzuimi te kikal ah kitelkhialhna, ki etkhialhna, kimuh khialh na te hongpiang hi.

Nuntakna Thu ahi, upna tawh i gam i lei, i khua i tui puahlo in, Pasian leh upna paulap in, leitung nuntakzia te tawh i puahsawmzaw hi. Kaalkhat ah nisagih om in, nai 168 om hina pi-in, sawm a khat zong ahilo, Nipi ni naikhat sung Pasian thu hilhding, Biakinn sung Pasian thu gending le ngaih

ding, biakpiakna piakding, thunget ding, Pasian phatding na ngawn hunhoih i pia zokei a, ahi zongin midangte tungah *Sawm a Khat* i hahngethei hi. Mite pianzia ngeina leh amaute nuntakzia te i zahtaak manin, thuman leh thutak i gen kei a, tuami te deihna zui in, Laisiangtho tawh thu i khuplai hi. Hi cibangin, *Nuntakna Thu* ahi upna in nuntaknazia ahi ngeina (pianzia, paizia, thu ngaihsutzia, khuavai, beh le phung vai akipan nisim nuntakzia) pen Pasian mai-ah lamsangin siangtho sak ding hina pi-in, athu i lehluan sakthei hi.

Anunung ciangin, ***Consumed Diocese, Consumed Parish, Consumed Christians*** aki ci mite i suak thei hi. ***Consumed Diocese*** cih ciangin *Diocese* sung pan leh *Diocese* tungpan ngahding alamen tawntungte cihna ahihi. *Diocese* ah ahi a, Parish le Khua te ah ahi zongin, Pawlpi tungpan khua ading, innkuanpihte ading, kei ading cihbangin ngahding bek ngaih sutna tawh akidim Christian te omna *Diocese* leh *Parish* te cihna ahihi. Hicibang mite sungah thuzui mite sangin, pan munnei te leh Pasian nasem akici mite 75% bang kihel tawn tung thei hi cihthu phawkhui mahmah hi.

Thukhupna:

Eite ciapteh tawntung ding thu in, Abraham upna thu ahihi. Pasian in Abraham kiangah, "Na Pa inn leh, na beh naphung, na u na naute omna gam ahi, hih gampan in pai khia in," (Piancil 12:1) ci-in, Abraham zong tuabangin hong gamta hi. Pasian sawlbangin hong paikhiat manin, Upna tawh akilam Ngeina Inn honglam in, tua Upna in amah midik pa tangsak hi.

Kammal pawlkhat (vocabulary)

Consumed diocese	Ngahdingbek lamet na anei thuzui te omna diocese
Consumed parish	Ngahdingbek lametna anei thuzui te omna parish
Consumed Christians	Pawlpi pan, Christian mipih te tungpan, thu ummi te tungpan (diocese pan, parish pan, kipawlna pan) bang ngahding cihbek alamen mite

Ref:

Joseph Cardinal Ratzinger, "Christ, Faith, and the Challenges of Cultures," Given in Hong Kong to the presidents of the Asian Bishops' Conferences and the Chairmen of their Doctrinal Commissions, March 2-5, 1993.